

55

12. apríl

REGLUGERÐ**um breyting á hafnarreglugerð fyrir Dalvík, nr. 157 1. september 1939.**

1. gr.

Á eftir VIII. kafla reglugerðarinnar komi nýr kafli, er verði IX. kafli, svo hljóðandi:

Gjald samkvæmt 11. gr. hafnarlaganna 3. f.

Af bátum, sem gerðir eru út frá Dalvík, greiðist gjald afla þannig:

1. Af þorskveiðum greiðist 1½% af brúttó söluverði afla, lifur meðtalin.
2. Af síldveiðum greiðist ½% af brúttó-afla.

2. gr.

Útgerðarmaður bátsins ber ábyrgð á, að gjald þetta sé greitt hafnarsjóði. Gjaldið fellur í gjalddaga í lok hverrar vertíðar.

Reglugerð þessi staðfestist hér með samkvæmt lögum nr. 66 8. september 1931 til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 12. apríl 1944.

Vilhjálmur Þór.

Vigfús Einarsson.

56

14. apríl

Staðfesting ríkisstjóra á skipulagsskrá fyrir „Minningarsjóð hjónanna Þorsteins Hjartar Árnasonar hreppstjóra og Matthildar Guðmundsdóttur ljósmóður“, útgefin á venjulegan hátt að mandatum af dómsmálaráðherra 14. apríl 1944.

Skipulagsskráin er þannig:

SKIPULAGSSKRÁ

fyrir minningarsjóð hjónanna Þorsteins Hjartar Árnasonar hreppstjóra og Matthildar Guðmundsdóttur ljósmóður, sem bjuggu á Dyrhólum 1872 til 1905.

1. gr.

Sjóðurinn heitir Minningarsjóður hjónanna Þorsteins Hjartar Árnasonar hreppstjóra og Matthildar Guðmundsdóttur ljósmóður.

2. gr.

Stofnfé sjóðsins er jörðin Dyrhólar (Vesturhús) í Dyrhólahreppi innan Vestur-Skaftafellssýslu.

Jörðin var eign nefndra hjóna og gekk að þeim látnum í arf til barna þeirra, sem með skjali þessu gefa hana Dyrhólahreppi til fullrar eignar og umráða, með jarðarhúsum og tilheyrandi mannvirkjum ásamt kúgildum, reka á fjörur jarðarinnar og öllum öðrum hlunnindum, sem henni tilheyra. Jarðarhúsin, nema að krónutali 1450.00 — fjórtán hundruð og fimmtíu — krónum.

3. gr.

Jörðin er, eins og segir í 2. gr., afhent Dyrhólahreppi til ævarandi eignar. Aldrei má hreppsnefnd Dyrhólahrepps, né heldur nokkur annar, veðsetja jörðina eða selja hana öðrum, hvernig sem á stendur.

4. gr.

Núverandi ábúandi hefur að sjálfsögðu rétt til lífstíðarábúðar á jörðinni og með sömu skilmálum, sem hann nú hefur. Að honum látnum eða burtfluttum skal jörðin jafnan byggð með lífstíðarábúðarrétti og með hæfilegu eftirgjaldi ásamt öðrum skilmálum, sem tryggja það, að jörðin sé vel setin, enda fari ábúðarrétturinn í þeim efnum eftir gildandi lögum.

Ekki má sjóðurinn taka að sér, að reisa eða halda við húsum eða byggingum á jörðinni.

5. gr.

Árlegt eftirgjald jarðarinnar og þær 1000 — eitt þúsund — krónur í peningum, er stofnendur sjóðsins gefa og afhenda nú þegar, skal leggja til ávöxtunar í Aðal-deild Söfnunarsjóðs Íslands eða aðra jafntrygga stofnun.

Þegar árlegt eftirgjald jarðarinnar með ársrentu af innstæðu sjóðsins, nemur 600 — sex hundruð — krónum eða meiru, skal stjórn sjóðsins heimilt að verja allt að $\frac{3}{4}$ hlutum teknanna, árlega, til verðlauna þeim til handa í Dyrhólahreppi, sem skara fram úr í skógrækt og trjárækt og blómarækt á ábýlisjörðum sínum.

Afgangurinn, eða $\frac{1}{4}$ hluti ársteknanna, skal leggjast við höfuðstólinn með þeim tekjuauka, er sjóðnum kann að bætast með gjöfum manna eða áheitum.

Fari svo eitthvert árið, eða árábil, að ekki þyki ástæða til þess að veita verðlaun úr sjóðnum, leggjast allar árstekjurnar við höfuðstólinn. Höfuðstól sjóðsins má aldrei skerða.

6. gr.

Aldrei má veita neinum manni minni verðlaun á ári úr sjóðnum en 150 — eitt hundruð og fimmtíu — krónur.

7. gr.

Ef ábúandi jarðarinnar sýnir sérstakan dugnað í sandgræðslu eða vörnum sandfoks á jörðinni, þá öðlast hann sama rétt til verðaluna og þeir, sem 5. gr. stofnskrárinnar veitir rétt til verðlauna úr sjóðnum.

Ábúandi jarðarinnar gengur að öðru jöfnu fyrir verðlaunum úr sjóðnum.

8. gr.

Stjórn sjóðsins skipa hreppsnefnd Dyrhólahrepps á hverjum tíma og ber hún ábyrgð á öllum fjárreiðum hans og ráðstöfunum, samkvæmt skipulagsskrá þessari.

Skulu og vera tveir endurskoðendur sjóðsins, kosnir á hreppskilafingi til sama tíma og hreppsnefnd er kosin.

Stjórn sjóðsins og endurskoðendur vinna án þóknunar, en greiða má allan útlagðan kostnað af fé sjóðsins.

9. gr.

Reikningsár sjóðsins er almanaksárið og skulu reikningar hans sendir árlega, endurskoðaðir, fyrir marzmánaðarlok, til sýslunefndar Vestur-Skaftafellssýslu til athugunar og úrskurðar.

10. gr.

Þegar farið verður að veita verðlaun úr sjóðnum, samkvæmt framansögðu, skal stjórn hans með nægilegum fyrirvara auglýsa meðal hreppsbúa hvenær umsóknir

56 skuli koma til nefndarinnar og um leið taka það fram, ef einhvers sérstaks er krafizt 14. apríl til þess að geta komið til greina við úthlutun verðlaunanna.

11. gr.

Skipulagsskrá þessi skal borin undir hreppsnefnd Dyrhólahrepps og sýslumanninn í Skaftafellssýslu til samþykkis.

Leita skal staðfestingar á skipulagsskrá þessari hjá því æðsta valdi á Íslandi, sem með slík mál fer og hún síðan birt í Stjórnartíðindunum.

Reykjavík, Eskifirði, Vestmannaeyjum, í febrúarmánuði 1944.

Friðrik Þorsteinsson, Ránargötu 2, Reykjavík, 16. febr. 1944.

pr. Gróa Sigríður Þorsteinsdóttir Einarsson, Osland P. O., B. C., Canada,

Friðrik Þorsteinsson.

Elín Ragnheiður Þorsteinsdóttir, Eskifirði, 20. febr. 1944.

Elín Þorsteinsdóttir, Löndum í Vestmannaeyjum, 28. febr. 1944.

Matthildur Þorsteinsdóttir, 28. febr. 1944.

57

17. apríl

REGLUGERÐ

um breyting á reglugerð nr. 133 28. des. 1936, um tekjuskatt og eignarskatt.

1. gr.

16. gr. B 5 orðist svo:

Fyrning.

Ef kostnaðarverð hlutar er nefnt a, verð hlutarins, eða eftir atvikum áætlað verð hans, þegar hann verður lagður niður c, og tala þeirra ára, sem hluturinn endist eða ætla má að hann muni endast b, skal árleg fyrning teljast $\frac{a-c}{b}$

Ef hlutur verður ónýtur áður en afskrift hans er lokið, skal færa eftirstöðvar af afskrift hans til gjalda það ár, sem hluturinn verður ónýtur.

Ef hlutur er seldur hærra verði en hann er fyrndur niður í, skal mismunurinn á söluverði hans og eftirstöðvum af afskrift hans teljast skattskyldar tekjur. Þetta á þó ekki við um fyrningu á fasteignum og skipum.

Ef eignarréttur til einhvers hlutar er takmarkaður við vissan árafjölda, þannig að aðili verður að láta eignina af hendi eða eyðileggja hana innan ákveðins tíma, endurgjaldslaust eða án þess að fullar bætur komi fyrir, má miða fyrningu hlutarins við þann tíma, sem eignin á eftir að vera í eigu gjaldanda.

Afskrift skal því aðeins telja til frádráttar tekjum, að fært sé svo fullnægjandi bókhald, að séð verði, hvornig hún er reiknuð og bókfærð, þannig að á hverjum tíma sé auðvelt að sannprófa hana.

Fyrningu skal reikna af kaupverði eða kostnaðarverði. Þó skal reikna fyrningu húsa, annarra en verksmiðjuhúsa og gróðurhúsa, af fasteignamati þeirra. Þegar gömul tæki eru keypt skal sérfróður maður meta endingarmöguleika þeirra og skal afskriftin miðuð við það mat. Þegar svo stendur á, má ákveða fyrningarhundraðstölu aðra en þá, sem ákveðin er fyrir sömu tæki ný.

Skip, sem eingöngu eru notuð til síldveiða, og önnur skip, sem eru í notkun aðeins 2—3 mánuði á ári hverju, skulu afskrifast með 90% af venjulegri ársfyrningu.